

Rhawm Ghawx Sam Pleek

Sam Pleek's greed



Wa, Parauk

Rhawm Ghawx Sam Pleek

Sam Pleek's greed

Cao Tiem Lih : A Shiex

Cao Pawd Riieng : A Shiex

Lox Lai Shiao : Lai Vax

Teei Khaing : Lai Been Akha

Cao Toe lih : Sai Rong Khun

Bawg Plih Lih : Bawg (1)

Khix Num : 9 / 2021

Author : Ah She

Illustrator : Ah She

Original Language : Akha

Translated Language : Wa

Translator : Sai Rong Khun

Edition : First Print

Date : Sep / 2021

Wa, Parauk

Myanmar

Copyright © 2021, Literature Department Of WBC, SIL

For permission to reuse, contact the copyright holder.



Didix daux yaong tix yaong koe mex moeng pa mi, pa mawh Sam Pleek mai Ok Tao heue. Viang kiex mi tom ang lai uik ih kawx kiex koe kawn sibun tix kaux ngie, ceu kaux nawh mawh Yex Rong heue. Sam Pleek nawh ang fah rhawm ka sin ngao pa koe tix, nawh keud son sang naog khri daux nyiex ku bawg yam heue.



Tix singaix, yam nyiat Sam Pleek
ti it mai laux ti, nawh keud grawng son
sang naog khri kadaux nyiex nawh heue.
Rhawm keud Sam Pleek kin hu sipie
nawh ang lai pon giex rhawm tix heue.
Yam an pui pa ceep kraung paing lih
hoek plak sivoe ngai Sam Pleek, nawh
siyaoh mai keud ti sang kaoh to hu heue.



Pui ceep kraung paing an ah nin ka Sam Pleek "Ceu pa simie maix ti cie, aux sang yuh maix cie." Sam Pleek deeh ah nin "Can pa teeh aux ka taix aux, kieh lih mawh khri heue." Pui ceep kraung paing ah "Kieh mawh awm pa simie maix ti lo" mai krai nawh grai hu heue. Sam Pleek nawh kied sidaing fah rhawm kheu sang pon ti khri naog daux nyiex, nawh keud sang teeh ceu patix sivoe khawm siyaung kaux tix heue.



Yam an Sam Pleek keud ti sang
nyaux rawm, yam giex nawh kawx rawm,
kawx rawm mai rawm lih ti mawh khri
heue. Yam sang sawm nawh kawx tawng
mai eep kawx lih ti mawh khri uik heue.
Viang nawh ang yaox nyaux ceu pa simie
nawh ti nyaux, ang yaox ih ceu pa simie
ti ih kawx nawh ang laux rhawm kied
sidaing fah rhawm kheu naog khri daux
nyieix nawh heue.



Ang rheung, kawn bun pa sidaing moh nawh tix kaux khaing, Yex Rong to ti hoek mai kok "Keeing keeing" heue. Sam Pleek kawm kawn tix Yex Rong mai lih ti mawh lon khri heue. Yam yaox Ok Tao kawn sibun tix lih mawh lon khri, nawh yiem mai tub naug tix ah nin "Maix lak yuh kawn tix lih mawh khri. Phan maix ang yaox ih, ang yaox nyaux maix sang yum kah lie?" Kheu jao laux rhawm Ok Tao, Sam Pleek klih rhawm "Aux hoik lud .. aux hoik lud" ah yuh nan heue.



Sam Pleek keud daux rhawm "Viang koe khri miex ding kawx ang koe krax nyawm rhawm, Kawn aux hoik lih mawh lon khri, phan aux baox teeh moeng aux kawx nawh tak sang lih mawh lon khri." Yam an pui ceep kraung paing lih ti hoek mai ah nin ka Sam Pleek "Yuh ka mawx. . Sam Pleek ceu pa lo maix hoik grum naog lie?" Sam Pleek deeh pawk "Lox pa rawg aux hoik lud, aux hoik tawng koe khri tom nie kawx ang grum naog, maix deeh yuh aux awm pa prim awx" ah nan heue.



Pui ceep kraung paing an " Kieh mawh awm pa simie maix ti cie" ah nan mai grai hu heue. Yam an kuceu khawm-uik lih ti mawh awm pa prim, Sam Pleek mai Ok Tao gaux rhawm mai klien Yex Rong kheu deeh lih ti mawh pui heue. Jah singaix an Sam Pleek deeh koe rhawm pa fah rhawm ka singao pa koe tix mai deeh chix teem ka pui pa hot shia, ka singao pa koe tix heue.

